

TITU

Titu zīkena Kereti būsun

¹ Makū Pōlu, Luda zòblerii, Yesu Kirisi zìriin ma ũ. À ma zī mà gbē kū Luda n sēno kara a náanikenan mà tó ò a donyīze yāpura dō, ² de n wé gō dō wēndi kū àdi lākaroī kū Luda a lé sè zaade andunia dí kátero. Àdi éke to sōro. ³ Akū yā pìi bō gupuraa a gōroa waazi kū Luda ó Surabarii dàmene ma ke gūn lākū à dìte nà. ⁴ Makū mé ma takada dí kēnne Titu, ma né yāpura Yesu zé kū ó kú lēele gūn. De Luda kū Kirisi Yesu ó Surabariio gbēke kenne, à n gba aafiaa.

⁵ Ma n to Kereti, de n yā kū ò gō gwenō gōgō, n gbē zōkōno dìte wēte kū wēteo lākū ma ònne nà. ⁶ À mana gbē zōkō gō kun taari sari nomendode ũ. A nēno gō ludanaanikerino ũ, òsungō n dō né zāzāde sāgbānadenō ũro. ⁷ Zaakū gbē zōkō bi Luda zīgwareime, àsungō de taaride ke ìadāri ke pōfēri ke wēderi ke gbē pāsī ke ogōvāniweteri ũro. ⁸ Séde àgō de nibōkūri ũ, laakaride kū à zè kū yāmanakenaao ũ, gbē sūsū kū à kú adona akūsō à a zīda kūna dō ũ, ⁹ gbē kū à zè sūsū kū yā náanide kū òdi dañneo ũ, de à le à lé da gbē pāndenōa kū yāzededannēnaa pìio, à gbē kū à bō a yā kpenō éke káinne n òi.

¹⁰ Zaakū sāyāmarisaride kū òdi gbēno likara kū n yā'onaaonon dasi, atēnsa gbē kū ò zè kū tōzōyāono.

¹¹ Òdi on būnu yaka. À mana ò léso dañne. Òdi yā kū à de ò dañnero dañne ogō bēne lena yāi. ¹² Kereti būsū annabi ke pì, Keretino bi ékedenome, nòbo

pāsīnɔmɛ, ye'uide póke kopirisarínɔmɛ. ¹³ Yã pì bi yāpuramɛ. Abire yāi ñ kpākēnyĩ manamana, de ò zé sé súsu. ¹⁴ Òsun laakari dɔ Yudanɔ garaaro ke gbē kū ò kè yāpuraa yāditɛnanɔ. ¹⁵ Póke dìgɔ gbāsī gbāsīsaridenɔnɛro, akūsɔ póke dìgɔ gbāsīsari ludayādarisari gbāsīdenɔnɛro, kū n̄ laasun kū n̄ nèsɛɛo vāni yāi. ¹⁶ Òdi pi ò Luda dɔ, akū n̄ yākenaa dì n̄ éke bo. Bɛgirinɔmɛ, òdi yā maro, òdi fɔ ò yā mana ke kero.

2

Yādannɛna zéde

¹ Mɔkɔn sɔ, ñ yā kū àdi kɔ sé kū yāzɛdedannɛnaao dańɛ. ² Ñ da mare zɔkɔnɔnɛ ògɔ n̄ zīda kūna dɔ gbē bèɛɛdenɔ ũ, laakaridenɔ ũ. Ò zé sé súsu kū yenyĩo kū menao. ³ Ñ da nɔgbē zɔkɔnɔnɛ dɔ n̄ kunna gɔ de donyĩri mananɔ kunna ũ. Òsungɔ de gudɛri ke wē zònɔ ũro. Ò yā mana dańɛ, ⁴ de ò lé da nɔzārenɔa n̄ baadi gɔ ye a zāi kū a nénɔ, ⁵ ògɔ de laakaridenɔ ũ gbāsī sari, ò laakari dɔ n̄ ɔn zīa, n̄ baadi mì nate a zānɛ de òsun Luda yā vāni boro yāi.

⁶ Ñ lé da kefennanɔa dɔ ògɔ laakari vī. ⁷ Ñ yāmanakena zé mɔńɛ a pínki gūn. N yādannɛna gɔ bèɛɛ vī à kɔ sí kū n̄ yākenaa ⁸ kū yāzɛde kū oni fɔ ò a éke boro, de wé'ì gbē kū ò bò n̄ kpɛnɔ kū, òsun yā vāni le ò o ó yā musuro yāi.

⁹ Ñ lé da zònɔa ò mì nate n̄ dikirinɔnɛ yā sīnda pínki gūn, ò yā kū ani kángu ke. Òsun yā lim̄maro. ¹⁰ Òsun kpāni om̄maro. Ò tó ògɔ n̄ dɔ gbē náanidenɔ ũ manamana, de Luda ó Surabari yā kū òdi dańɛ wé bo yā sīnda pínki gūn.

11 Zaakū Luda gbēke kū à sù kū surabanaao gbē sīnda pínkinεε bò gupuraa. 12 Gbēke pì ten dawεε ò kpε li yā kū adi kō sí kū Luda yāoronε kū andunia pónidεnanɔ, de ògō ó zīda kūna dō gbē mananɔ ũ, ludayāmarinɔ ũ andunia tera díkīna gūn, 13 ó wé gō dɔ gɔɔ arubarikade kū óten dāa. Àkūmε ó Luda zōkō ó Surabari Yesu Kirisi sugɔɔ gakuride ũ. 14 À a zīda kpà ó yāi, à ó bó vāni sīnda pínki gūn, à ó gbāsī gògo, de ò gō a zīda gbē kū ò yāmanakεna ania vīnɔ ũ. 15 Ñ yā pìnɔ dañne ñ lé daomma. Ñ kpākēnyī kū iko kū ñ vīo pínki. Ñsun tó gbēke n gya boro.

3

Ò laakari dɔ yāmanakεnaaa

1 Ñ dɔ n gbēnɔgu ò mì nate gbānadenɔnε kū iko-denɔ, ò ñ yā ma, ògō kú kū yāmanakεna sīnda pínki soruo. 2 Òsun gbēke tó vāni síro. Ògō de nèsedode yāketesaridenɔ ũ kū ò busana gbē sīnda pínkinε. 3 Zaakū ókōnɔ se, ó faya vī yāro, ludayādarisarinɔn ó ũ. O sātε, ó de pōnnakεna kū dà vāni sīnda pínkiò zònɔ ũ. Odìgō kú nèse vānio kū nèsegōbao. Ó de bεgirinɔ ũ, o zākōgu. 4 Bee kū abireo kū Luda ó Surabari gbēke kū a yenyīo bò gupuraa, 5 akū à ó sura bà. Adi ke ó yāmanakεna yāinlo, kū à ó wēnda dō yāimε. À ó zú ò à ó í dufu, à tò o gō gbē dufunɔ ũ kū a Nini 6 kū à pìsiwá gbānao Yesu Kirisi ó Surabarii gāi, 7 Abire yāi yā bò kūoo nna a gbēke yāi, o gō túbiberinɔ ũ, ó wé dɔ wēndi kū àdi lākaroi. 8 Yā pì bi yāpuramε.

Má ye ñ gā na yā pìnɔ onaaa manamana, de ludanaanikerinɔ le ò mè kpá yāmanakεnaaa.

Abirekū mana, à karana vī gbēnɔnɛ. ⁹ Ñ pā mīsariyā yāgaganaane kū dizinɔ tó kōnɔwɛnaao kū fītiio kū lékpakōana Musa doka yā musuo, zaakū yā pānɔmɛ, ò karana vīro. ¹⁰ Ñ kpākē gbē kū àdi tó ò kēkōaai bee gèn pla, gbasa ò péa. ¹¹ Ñgō dō kū gbē bire taka sātɛ. Durunnakeriime, à a zīda bòbɔ.

Lézammanaa

¹² Tó ma Atema ke Tikiku zīm̄ma, ò zé wete ò su ò ma le Nikɔpɔli, zaakū ma zεo mà bunsire láka gwe. ¹³ Ñ ania ke ò zàna ke bùsu dokadōri Zenasine kū Apoloo de pòke sún kīar̄maro ò tá gūn. ¹⁴ À mana ó gbēnɔ yāmanakɛnaa dada ò ò zīda kpáa, ò yā kū à kō sionɔ bokɔte de òsungō kun pāro. ¹⁵ Gbē kū ó kú lɛɛlenɔ fɔ kpàmma ò pínki. Ñ fɔ kpá gbē kū ò yewái Yesu zé gūnnɔa. Luda gbēke keáre á pínki.

Luda yá takada kú Bisá yáo

Portions of the Holy Bible in the Busa language of Nigeria

copyright © 2005 SIM International

Language: Bisá (Busa)

Translation by: SIM

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-10-10

PDF generated using Haiola and XeLaTeX on 11 Nov 2022 from source files dated 9 Oct 2020

8631d380-7d17-5581-abf9-174814e8ccc3